

Newspaper	BERITA HARIAN
Date	7/4/2012

Sabtu
7 April 2012

BERITA HARIAN

Ke-51 paling gembira

BH-7/4/2012

Kaji selidik terbaru PBB iktiraf kedudukan Malaysia

NEW YORK: Malaysia diiktiraf sebagai negara ke-51 paling gembira di dunia dan kedua di Asia Tenggara, berdasarkan kaji selidik terbaru Pertubuhan Bangsa-Bangsa Bersatu (PBB).

Status Malaysia yang mana penduduknya hidup paling bahagia dan gembira di dunia terkandung dalam 'Laporan Kebahagiaan Sedunia' yang dikeluarkan di Ibu Pejabat PBB di New York, baru-baru ini.

Laporan itu yang dikumpul bagi Persidangan PBB Mengenai Kebahagiaan di New York, Isnin lalu berdasarkan maklum balas kaji selidik dari 2005 hingga pertengahan 2011 untuk mengukur tahap kebahagiaan 156 negara.

Kaji selidik itu dibuat berdasarkan beberapa penunjuk, antaranya

kemakmuran kebendaan, kecenderungan umum seseorang dan tahap kepuasan dengan aspirasi asas masing-masing.

Singapura muncul negara paling gembira di rantau ini dan di peringkat dunia menduduki tangga ke-33, selain Thailand (52), Myanmar (72) dan Indonesia di kedudukan ke-83.

Negara maju Scandinavia seperti Denmark, Finland dan Norway menduduki tiga tempat teratas dalam senarai itu yang mencadangkan penduduk negara kaya cenderung untuk lebih bahagia, walaupun kekayaan tidak menjadi faktor penentu untuk mengukur tahap kebahagiaan.

Laporan itu mencatatkan, pada tahap individu pula, kesihatan mental dan fizikal yang baik, tempat seseorang bergantung, jaminan

pekerjaan dan keluarga yang stabil adalah faktor penting.

Amerika Syarikat, negara paling kaya di dunia, menduduki tempat ke-11, Jepun (44), China (111), Iran (84) dan Syria di tempat ke-106. Negara yang paling tidak bahagia ialah Togo, Afrika Barat.

Sementara itu, Ketua Menteri Melaka, Datuk Seri Mohd Ali Rustam, berkata laporan akhbar *New York Times* (NYT) yang menyenaraikan Melaka sebagai antara 45 destinasi dunia perlu dilawati pelancong antarabangsa sepanjang 2012, dijangka mula memberi impak pada bulan ini.

Katanya, ini berdasarkan kepada trend terdahulu yang menyaksikan banjir pelancong berkenaan ke negeri ini, banyak dicatatkan pada April sebelum berterusan sehingga penghujung tahun.